



Jens Napātôk'  
Inatsisartunut ilaasortaq, Naleraq

**§ 37 naapertorlugu apeqqutit akineqarnerat nr. 153/2023- nunaqarfinni multihalit pillugit**

10-11-2023  
Suliap normua: 2023 - 3471  
All. nr. 23604814

Asasara Jens Napātôk'

Postboks 1029  
3900 Nuuk  
Oqarasuaat: +299 34 50 00  
Email: ikin@nanoq.gl  
www.nanoq.gl

Inatsisartut suleriaasiat naapertorlugu apeqqutinnut qujanaq. Apeqqutigineqartut tullinnguuttuni akissuteqarfigissavakka.

***Apeqqut 1: Nunaqarfiit sorliit multihalini taaneqartartunik peqarpat?***

**Akissut:** Idrættens analyseinstituttip Kalaallit Nunaanni Timersoqatigiit Kattuffiat suleqatigalugu misissuina (2015) malillugu nunaqarfinni timersortarfiit/eqaarsaartarfiit minnerit 9-upput.

- Saqqaq
- Oqaatsut
- Ilimanaq
- Kullorsuaq
- Kangerlussuaq
- Kangaamiut
- Atammik
- Qeqertarsuatsiaat
- Alluitsup Paa: timersortarfik/eqaarsaartarfik minneq

***Apeqqut 2: Aappilattumi Upernaviup nunaqarfiani multihaliliortoqassappat taamaattoq qanoq angitigisoq sananeqarnissaa naatsorsuutigineqassava?***

**Akissut:** Aappilattumi multihaliliortoqarnissaanut qanoq pisariaqartinneqartiginersoq pillugu Naalakkersuisut ilisimasaqanngillat. Angissusaa pisariaqartinneqarnera aningaasanillu atorneqartussanik peqassuseq aallaavigalugit aalajangerneqarsinnaavoq.

***Apeqqut 3: Naalakkersuisut nunaqarfinni multihaleqanngitsuni multihalini sanaartussamaarpat?***

- a. Taamaattunik sanaartornissamik pilersaaruteqartoqarpat taava qaqugu taamaattut sananeqarnissaat naatsorsuutaava?

b. Taamaattoqanngippalli Naalakkersuisut nassuiaaqqueneqarput tamanna pillugu.

**Akissut:** Naalakkersuisut nunaqarfinni multihaliliornissanut pilersaaruteqanngillat.

Timersorneq timigissarnerlu pillugit Inatsisartut inatsisaat nr. 15, 6. juni 2016-imeersumi timersorfinnik sanaartornermut, iluarsaassinermit aaqquissuussinernullu maleruagassat aalajangersarneqarput.

§ 16, imm. 1 aamma 2-mi malittarisassanik aalajangersaasoqarpoq kommunalbestyrelsip tapiiffigisinnaagai sanaartorneq, aserfallatsaaliineq, iluarsaaqqinneq aamma pequsersuineq timersortarfinnik, aammalu tapiissutit taamaattut pingaarnertut najukkami namminermit timersornermut ingerlatsivinnut tunniunneqartassasut.

§ 14, imm. 1 aamma 2-mi malittarisassanik aalajangersaasoqarpoq Naalakkersuisut tapiiffigisinnaagai sanaartorneq, aserfallatsaaliineq, iluarsaaqqinneq aamma pequsersuineq timersortarfinnik, aammalu tapiissutit taamaattut pingaarnertut najukkami namminermit nunallu immikkoortuini timersornermut ingerlatsivinnut tunniunneqartassasut.

Uani pineqarput najukkani timersortarfiit.

Naalakkersuisut Kalaallillu Nunaanni Timersoqatigiit Kattuffiat 2023-2027-mut naammassisaqarnissamik isumaqatigiissuteqarput. Naammassisaqarnissamik isumaqatigiissummi ilaatigut isumaqatigiissutigineqarpoq timersortarfiit pioreersut siunissamilu sananeqartussat pillugit pisariaqartitaat pillugit misissueqqissaartoqassasoq. Misissuinermit ilaatigut aamma timersortarfiit ukiuni qulini tullinnguuttuni qanoq annertutigisumik ineriartortinneqassanersut ilaatinneqassapput.

Inussiarnersumik inuulluaqqusillunga

  
Aqqaluq B. Egede